

## Giryama - Wokolwi Maoro - Salvation Scriptures

AEfeso 2:2 Wakathi uwo mwakala mukiishi kwa kugathuwa maut'u ga urumwengu uu. Mwakala munathuwa gago ga muthawali wa hewani, ariye iye ndiye iryahu roho iathawalao at'u mario kinyume na Mulungu.

Math'ayo 6:10 Uthawaliwo naudze. Mahendzogo nagahendeke kuku ts'i, here gahendekazho ko mulunguni.

Luka 22:42 "Baba, kala ni mahendzogo niusira gaga mateso gaga, ela visikale here nihendzazho mimi, ela navikale here uhendzazho uwe, visikale here nihendzazho mimi bule."

Johana 16:7-9 Hatha vizho ninamwambira ujeri wenye, vindakala vidzo kwenu nichenda, mana kala sindakwenda ye Mwavizi k'andakudza kwenu, ela nichenda nindamuhuma kwenu. 8 Na andihokudza andauhenda urumwengu ung'alirwe Iwazu-Iwazu dzulu za dambi na ueri na hukumu. 9 Andaahendya mang'alirwe o at'u a urumwengu uu, kukala ni enye dambi kwa kukala k'amankuluhira mimi.

2 T'imoth'i 2:10 Kwa vizho, mut'u mimi ninavumirira mashaka, kwa ut'u wa ao mariotsagulwa ni Mulungu, ili ao nao madime kuokolwa ni Masihi Jesu na mapate nguma ya kare na kare.

ARumi 15:20,21 Na siku zosi, lengo rangu were ni kuhubiri Uyoro Udzo kwa at'u mario were k'amadzangwe kusikira dzina ra Masihi. Mana nere ts'endzi kujenga dzulu za musinji wa mut'u mungine. 21 Kwani Maoro ganaamba, "Aryahu mario k'amadzambirwa dzulu za kwakwe, mandaona; Na aryahu mario k'amadzasikira dzulu za kwakwe, mandang'alirwa."

Mahendo 2:36,37 36"Kwa vizho bai, Aizraeli osi ni mamanye kamare kukala yuyu Jesu muriyemusulubisha, be Mulungu wamuhendya akale Bwana kidza akale Masihi!" 37 Na lola o at'u marihosikira maneno gaga masikira kusha zhomu mo moyoni mwao hatha makimwambira P'et'ero na ahumwi andziye "Vikara ndugu zehu, fuhendedze be vinoo?"

AEburania 4:2 Kwani uwo uyoro udzo wa hat'u ha kuoya wambirizwa kwa o akare ehu dza zho Uyoro Udzo urizhohubiriwa kwehu siswi. Ela uyoro uwo k'aufwahire kit'u, mana mawambirwa ela k'amaukuluhirire.

Jeremia 24:7 - Math'ayo 22:37 K'uzhona Jesu akimudzigidza akimwamba, " 'Muhendze Bwana Mulunguo na moyowo wosi, na rohoro rosi, na akilizo zosi.'

Mahendo 16:14 Kahi za ao mariokala haho kusirikiza, were ni mwanamuche mumwenga aifwaye Lidia wa kula mudzi uifwao Thiyatira. Lidia were ana biashara ya kuguza vithambaa zha zambarau, naye were ni mut'u amuvoyaye Mulungu. K'uzhona zho Bwana akimuvugula moyowe ili akubali garyahu garigokala gananenwa ni P'aulo.

Math'ayo 13:14-16 Na garyahu maneno garigonenwa ni nabii Isaya haho kapindi vivi gadzathimira kwao. Kwani Isaya wanena akiamba, 'Mundasirikiza na kusirikiza ela k'amundang'alirwa bule. Mundalola na kulola ela k'amundaona bule. 15 Mana miyo ya at'u aa idzakala mikomu, masikiro gao madzagagandiza, matso gao madzagafinya, masidze makaona na go matso gao, makasikira na go masikiro gao, makang'alirwa na yo miyo yao, makanigalukira mimi, nikaahoza.' 16 Baha ninwi, kwani masikiro genu ganasikira na matso genu ganaona.

Isaya 6:9,10 - Mahendo 28:27 Mana miyo ya at'u aa idzakala mikomu, masikiro gao madzagagandiza, matso gao madzagafinya, masidze makaona na go matso gao, makasikira na go masikiro gao, makang'alirwa na yo miyo yao, makanigalukira mimi, nami nikaahoza.'

Mariko 4:11,12 Jesu akiambira, "Ninwi mwajaliwa kuimanya yo siri ya uthawali wa Mulungu. Ela o mario ndze ya wo uthawali, manasikira kwa ngira ya mafumbo, 12 kwamba malole na kulola, ela masione, masirikize na kusirikiza, ela masing'alirwe. Kwani kala makaona na kung'alirwa makamuuyira Mulungu, naye akaausiza dambi zao."

Johana 12:39,40 Kwa chausa kiki k'amadimire kukuluhira. Kwani Isaya waamba kaheri, 40 "Mulungu adzagahendya matso gao gasione na adzaihendya miyo yao ikale mikomu masidze makaona na matso gao na miyo yao ikang'alirwa, makanigalukira mimi, nikaahoza."

ARumi 11:7,8 Kwa vizho bai, zho marizhokala Aizraeli manavimala k'amavipatire bule, isihokala aryahu achache mariotsagulwa ni Mulungu. Angine osi mahendya makale na singo nyomu, hatha k'amamusirikizire Mulungu. 8 Kwani Maoro ganaamba, "Mulungu waap'a roho ya uts'indzizi, na matso gasigoona, na masikiro gasigosikira. Na hatha warero kidza vichere vizho."

2 AT'h'esalonike 2:10,11 Naye andahumira uthiriri wa kila samupuli kuakenga aryahu at'u mario makwendani kahi za kifwa cha kare na kare. At'u aa manakahala kuukuluhira uwo ujeri wa Jesu Masihi uriwo ndiwo ungawoaokola. 11 Vikara kwa kukala manaukahala uwo ujeri wa Jesu Masihi, Mulungu andaahendya mangamizwe yuya na makengwe ni yuyu Mubandi wa Sheria.

Math'ayo 13:18-23 Jesu akienderera kunena na anafundzie akiamba,  
"Vikara, sirikizani nimwambire mana ya ro fumbo ra mulayi. 19 Kila mut'u ariye akisikira neno ra Mulungu k'arielewa, ye Mui nikudza na kurusa ho moyoni ririholaywa. Bai mut'u dza iye nde iryahu mbeyu iriyogwa haryahu k'anda-k'anda ya ngira. 20 Ziryahu mbeyu zirizogwa mutsanga wa mawe-mawe, ni mut'u ariye akisikira neno thu, anarihokera kare mara mwenga, kidza anarihokera na raha. 21 Ela kwa kukala neno riryahu k'arina miziji moyoni mwakwe, mut'u yuyahu k'atoa naro bule. Kwani thabu, hedu mateso gakimudzirira kwa ut'u wa ro neno, k'avumirira bule, anaviricha kare. 22 Mungine ye ni here iryahu mbeyu iriyogwa miyani. Mut'u iye nikusikira ro neno ra Mulungu, ela vata za urumwengu, na ukengi wa mali, nikurikonya-konya ro neno hatha rikakala k'arindazhala kit'u. 23 Ela mut'u mungine ye ni here iryahu mbeyu iriyogwa kahi za mutsanga mudzo. Mut'u yuyu nikurisikira ro neno ra Mulungu, akarielewat'o. Bai at'u mario dza vizho yuyu, nikuzhala matunda. Yuno gana, yuya mirongo mihandahu, na mungine mirongo mihahu."

2 AKorintho 3:15,16 Na hatha warero, kila wakathi Sheria ya Musa ishomwaho, kidza kiriyahu kithambaa kichere kidzaazia mioyo yao.  
16 Ela wakathi mut'u amugalukiraho Bwana, kiriyahu kithambaa ni kuuswa.

Hosea 11:3-7 - Math'ayo 11:28-30 "Ndzoni kwangu ninwi nyosi musirimao, na murio mudzaremererwa ni mizigo nami nindamuoyeza. 29 Rivaleni gogo rangu, mudzifundishe kwangu, kwa kukala mimi ni mup'eho na mup'ore, nanwi mundaoya kamare kahi za maroho genu. 30 Kwani gogo rangu ni shushu na muzigo wangu k'auremerera."

Mahendo 26:18 ili ukaang'aze matso, na uagaluze mambole kizani mangire mulangazani, na kidza uamboze kula kwa nguvu za Shethani na mamugalukire Mulungu, ili kwa kunikuluhira mimi madime kusamehewa dambi zao na makale mana hat'u kahi za ao at'u mariotsagulwa ni Mulungu.'

2 T'imoth'i 2:24-26 Muhumiki wa Bwana k'avirya akale ni wa h'uwoh'ubo kunenezana na at'u, hat'uhe iye, niakale ni mut'u mup'ore kwa at'u osi, akale anadima kufundishat'o bila vitsukizi. 25 Aryahu at'u ambao ma kinyume naye, anavirya aakanye kwa up'ore ngaa Mulungu aagaluze mioyo yao na madime kuumanja ujeri, 26 Kidza maleukwe na mauchimbire wo muhego wa Shethani, ariye were waagwira na akialazimisha mathuwe zho zhakwe.

Ugunulo 3:17-19 Ati unaamba "Ni mushaha, nidzahenda vit'u hatha sina nitsowacho." K'umanya, ela una mashaka hatha unagwizisha

mbazi. Uwe u mukiya, kidza u kipofu, kidza u huhu. 18 Kwa vizho ninakuadha ugule vit'u vivi kula kwangu: gula dhahabu mbidzo ya zosi, iriyoochwa na moho ili ukale mushaha; gula k'andzu nyaruhe ili uvale uziye waebu wa huhuro; na muhaso wa matso ili wangize matsoni mwako uone. 19 Osini niahendzao mimi, nikuakanya na kuangiza akili. Bai kala na chadi na uthubu.

2 AKorintho 7:10 Kwani huzuni imufwahizayo Mulungu si huzuni ya kumuhendya mut'u adziuthe, mana huzuni iyo nikumuhendya mut'u akathubu na akapata wokolwi. Ela huzuni ya urumwengu inareha kifwa.

1 Athawali 18:37 - Mulungu turned heart back to Mulungu

2 AKorintho 4:4 At'u ao k'amakuluhira kwa kukala ye mulungu wa urumwengu uu adzaafunga kizuzu kahi za akili zao. Vivi vinaahendya kukala wo mulangaza wa wo Uyoro Udzo wa nguma masiwone bule. Mulangaza uu ni wa Masihi ariye nde muhalano wa Mulungu.

Luka 8:11-15 "Bai mana ya ro fumbo riri ni ii: Ziryahu mbeyu ni neno ra Mulungu. 12 Ziryahu mbeyu zirizogwa k'anda-k'anda ya ngira ni aryahu at'u masikirao neno ra Mulungu, gonya Shethani nikudza akadzarusa kula kahi za miyo yao, ili masidze makakuluhira na kuokoka. 13 Ziryahu mbeyu zirizogwa iweni, ni aryahu at'u mario makisikira neno thu, manarihokera kare mara mwenga, kidza manarihokera na raha, ela kwa k'amana miziji, manakuluhira kare kwa muda na majezwaho, manaviricha. 14 Ziryahu mbeyu zirizogwa miyani manaye ni aryahu at'u masikirao neno ra Mulungu, ela badaye maukaho, riryahu neno rinendakonywa-konywa ni maut'u ga urumwengu, ushaha, na raha za maisha, kwa ut'u uwo, k'amakumala bule. 15 Ela ziryahu mbeyu zirizogwa kahi za mutsanga mudzo, ni aryahu mario makisikira neno ra Mulungu manarigwira kwa uaminifu na miyo midzo, nao kwa kuvumirira ni kuzhala matunda."

Mahendo 15:11 Ela bai, hunakuluhira kukala siswi hunaokoka kwa mbazi za Bwana Jesu, karakara na ao."

ARumi 8:13 Kwani mukiishi kuthuwirizana na mwiri mundafwa. Ela mukigalaga mahendo gosi ga mwiri kukirira na iye Roho, mundaishi.